

Friday, May 29, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

**REGIONAL NEWS BULLETIN
(MIDDAY)**

<><><>

LALHLUPUIA PTC PASSED AWAY

Akashvani Aizawl Regional News Unit-a Champhai District Part Time Correspondent Pu Lalhlupuia chu tukin dar 7 leh a chanve khan Champhaiah a thi a, kum 65 mi a ni.

Pu Lalhlupuia hi cancer natna avangin hun engemawchen enkawl a ni a, vawiin chawhnu dar 3 ah a chenna in Champhai Venglai ah vui a ni ang.

Regional News Unit chuan kan thawhpui Pu Lalhlupuia kan chan ta hi lungchhiatthlak kan tiin kan ui hle a, Pu Lalhlupuia hi thuthar lak khawm leh thehdarh lama mi taima leh thawh hlawk tak a ni a, kum 30 chuang kan thawk ho a, Radio tana a hnathawh chhuanawm tak hi kan hre reng ang. A kalsan tak a nupui leh fate leh a laináte zawng zawng Pathianin awmpuiin thlamuan rawh se.

Chief Minister Pu Lalduhoma chuan a ui thu sawiin sorkar thuthar thehdarh kawngah te, sorkar leh mipuite inlaichinna tha din kawngah te, a bik takin Champhai leh Champhai district chanchinthar pho chhuahna kawngah te a thawh hlawk hle a. A hnaah a tuiin a inpe a, a entawntlak em em a ni a ti.

Mizoram Journalist Association pawhin an ui thu sawiin, Journalist hmasa Pu Lalhlupuia, tuna Champhai Dist. MJA President ni mek in ram tana a hnathawh te an hre reng an ti a, a kalsan, a chhungte leh Champhai Dist. MJA Lalpa'n awmpuiin thlamuan se an ti a ni.

Home Minister Pu K Sapdanga, Information & Public Relations Minister Pu B Lalchhanzova, Adviser to Chief Minister Pu H Ginzalal leh Political party hruaituten an ui thu an sawi bawk a ni.

Pu Lalhlupuaia hi Kum 1992 April ni 1 ah All India Radio Aizawl Regional News Unit hnuaiah Part Time Correspondent-ah a thawk tan a, kum 34 chhung AIR Chanchinthar-a a thawh chhung hian a thawhhlawk hle a, kum khat mah chawl lovin chanchinthar hmanga mipui chawmtu zingah a tel a ni. Chanchinbu lamah pawh sulhnu ngah tak niin, zirtirtu hna bansanin, Chhawkhlei Daily Newspaper leh Chuailo Daily Newspaper (Lenruah chanchinbu ni ta) te a enkawl a. Kum 1998 ah Champhai Journalist Assn. (CHJA) dintutute zingah telin Secretary i/c. Organisation hmasa ber a ni MJA Champhai District hruaitu hlun niin, President ah ngawt pawh kum 1991, 2000, 2010-2012, 2014-2016, 2024-2026, 2026- vawiin thlengin a chelh a ni. Mizoram Sorkarin Accredited Journalist a puante zingah telin, Sorkar bultumin Press Tour hrang hrangah a tel thin a, kum 2011 khan Assam leh Arunachal Pradesh, 2016-ah New Delhi, 2019-ah Nagaland, 2023-ah Sikkim-ah te a kal a ni.

<><><>

UNION MOS

Union Minister of State for Housing & Urban Affairs, Govt. of India Pu Tokhan Sahu chuan vawiin khan Champhai hmun hrang hrang a tlawh.

Pradhan Mantri Awas Yojana - Urban (PMAY-U) hnuaia Champhai Zote khuaa insak tanpuina dawngtu te insak a hmunah a en a, Zote a tlawh zawh hian Champhai District Hospital a tlawh leh nghal a, District Medical Superintendent Dr. Zatluanga leh Staff dang ten an lo dawngsawng a, Hospital chhung hmun hrang hrangte fang a fang kual a, hospital kalphung te hnathawkte hian an hrilhfiah nghal a ni.

Kahrawt Anganwadi pawh tlawhin thawktute leh naupang nu leh pa ten an lo dawngsawng a, Hemi hnu hian Sakti Sada , Champhai Vengthlang ami chu a tlawh leh a, he hmun hi hmeichhia pasal then avanga awmna nei lote awmna a nih bakah hmeichhia hleilenna tuar te enkawl na hmun a ni a, enkawl mek hmeichhiate hian an fate an awmpui ve bawk a ni.

Union Minister hian Keilungliah khua a tlawh nghal a, he hmunah hian PHE Department te chuan lo hmuakin Keilungliah khua a nih theihna tura hmalakna te, hmalakna tur hmachhawp la awm mek te an lo hrilhfiah a ni.

<><><>

PHE MINISTER

PHE minister Prof. Lalnilawma chuan Aizawl khawpui tui tlan ber Tlawng lui tui pump-na pakhat, Greater Aizawl Water Supply Scheme Phase-I tui pump khawl awmna chu tui lianin a chim phak loh tura a awmna hmun tihsan hna thawh a nih dawn avangin duh anga tam tui pump theih a nih dawn loh thu a sawi a; Aizawl mipuite chu tui ren tur leh fur ruahtui khawl turin a ngen.

Prof. Lalnilawma hian vawiin khan a pisaah thuthar thehdarhtu thenkhat kawmin, kum 2024-a Cyclone Remal vanga tuilianin Tlawng tui pump-na khawlte a chim nasat avanga harsatna thleng ang kha a thlen nawn tawh loh nan tui pump khawl te chu tui chim phak loha dahsan tum a nih thu a sawi a; naktuk May ni 30 atangin Phase-I khawl hi metre 5 vela sangin chawisan hna thawh tan a ni dawn a, thla 6 atanga thla 9 inkar vel chhunga thawh zawh theih beisei a ni, a ti.

Prof. Lalnilawma chuan Greater Aizawl Water Supply Scheme Phase -III, Setlak tui pump-na khawl pawh tuilianin a chim phak loh tura dahsan tho tur a nih thu a sawi a; hna hi thawh tan mai tura peihfel ni tawh mah se, mipui hna tuisem a khaihlak nasat lutuk loh nan Phase-1 hna thawh zawh hna thawh tan turin an in ruahman ta zawk tih a sawi baw.

<><><>